

1857

---

### Publicaziuns

Cloms da quen

Concessiun dil Cussegl Pign ils 20 da fevrer. Cumin dalla **Cadi**. Cloms da quen: Sep Antoni Giacomet retschevider da quen signur assistent Giachen Antoni Schmet, omisdus da **Tujetsch**.

Nova Gasetta Romontscha, 1857, nr. 10, 6 da mars

1857

La fiera da **Trun** ei stada frequentada da bia glieud e tiers. Vaccas, stiarls e vadials eis ei vegniu vendiu e zuar per bials prezis. Era la mendra caura ei vegnida sin in marenghin. La dretga fiera da cauras vegn denton tenuta mardis proxim a **Tujetsch**, nua ch'in sulet pur ha quest matg vendiu cauras per 340 frs. Silla fiera d'**Ursera** eis ei uonn catschau zun paucas vaccas. Ils purs fussen bein narradira, sch'els massen cun lur tiers sur cuolm, cura ch'els san vender quels en nuegl per stupents prezis.

Nova Gasetta Romontscha, 1857, nr. 23, 5 da zercladur

1857

Ins ha schon legiu vi e neu da sventiras daventadas cun affons tras tassis da mustgas. Quels dis vess era gleiti in affon da **Tujetsch** saviu vegnir per la veta sin quella moda. Ses geniturs vevan rasau ora en stiva pupi da mustgas che cuntegn era arsenic e per giavinar las mustgas pli fetg vevan els bess empau zucher sissu. Fertion ch'els eran occupai, va la buobetta vid il pupi, pren quel en bucca, il gust dulsch plai, ed ella maglia in ton. Per ventira ha ella cuninaga stuiu render ed entras spert agid medicinal eis ella mitschada dalla mort ed il geniturs culla tema. In niev exempel ch'ins sa mai esser precauts avunda el survigilar ils affons.

Nova Gasetta Romontscha, 1857, nr. 30, 24 da fenadur

1857

Ina descripziun dalla **Val Tujetsch**, sco habitonts e products, mira feuilleton: „Impressiuns da viadi I“.

Nova Gasetta Romontscha, 1857, nr. 38, 18 da settember – Mira pag. ....

1857

Signur assistent Gion Ludwig Bèr *Beer* da **Tujetsch** ch'ei morts la jamna vargada, ha fatg si als paupers dalla vischnaunca in legat da 1000 frs. Milsanavon duei ei vegnir partiu ora ad els ina buot sal. Per rugalar si ina baselgia ch'era en decadenza ha el per plirs onns testamentau il tscheins d'ina acla. Ultra da quei ha el era seregurdau da dus paupers orfens da siu vischinadi per ton pli tgunsch gidar quels tier in mistregn. *Il cudisch da mortoris noda: 17-9-1857 D. Assistentes Joannes Ludovic Beer, fegl da statalter Jacob Martin Beer e Maria Margarita Rueras e la remarca: Foutor pauperum/nescio, 37 onns*

Nova Gasetta Romontscha, 1857, nr. 39, 25 da settember

1857

Dallas treis medaglias d'aur partidas ora per products agricols, ha era la societad agricola da **Cuera** survegniu ina per siu grond e bi assortiment da tuttas sorts fretgs, nominativamein eis ei vegniu dau ad ella per puma tosta e per mèl (da **Tujetsch** e **Medel**).

Nova Gasetta Romontscha, 1857, nr. 42, 16 d'october

1857

Las elecziuns dil cusseglier naziunal han dau ella **Cadi** il sequent resultat: ... **Tujetsch**: Dr. Condrau 127, C. Latour 1; ...

Nova Gasetta Romontscha, 1857, nr. 44, 30 d'october

1857

**Cloms da quens.**

Ils quens dil defunct signur assistent L. Bèr *Beer* dueien vegnir dai en a signur assistent Tumaisch

Schmet, omisdus da **Tujetsch**.

Nova Gasetta Romontscha, 1857, nr. 47, 27 da november

**1857**

La jamna vargada ha finalmein era signur pader Sigisbert Monn da **Mustér**, che veva schon questa primavera survegniu la lubientscha d'extrar ord igl uorden claustral, bandunau per adina la claustra da **Mustér** e surpriu ad interim la caplania da **Sedrun**.

Nova Gasetta Romontscha, 1857, nr. 48, 4 da december

**1857**

L'ordinaziun dil Cussegl Pign, che constrenscha ils vitturins dalla **Surselva** dad ir silla via nova mo cun sliusas d'in bratsch e miez ladezia, ha fatg schliet saung en bia vischnauncas. Ils vitturins dils loghens giud via, sco **Lumnezia** e **Tujetsch** etc. san nunpusseivel duvrar quels maltschecs carpiens sin lur stretgas vias ed aschia stuessen els mintgaga brattar giu sliusa cura ch'els vegnan silla via nova. Quei fuss in grond discumet e caschunass dubels cuosts. ...

Nova Gasetta Romontscha, 1857, nr. 49, 24 da december